

Peruntukan pertama bangunkan Ampang Jaya

KUALA LUMPUR, Jumaat — Timbalan Perdana Menteri, Encik Ghafar Baba hari ini mengumumkan peruntukan pertama \$3 juta bagi melaksanakan projek pembangunan di kawasan Ampang Jaya.

"Ini adalah sebahagian daripada peruntukan yang dijangka berjumlah berpuluh juta ringgit bagi melaksanakan pembangunan di Ampang Jaya dalam jangka masa 20 tahun akan datang.

"Jumlah ini ialah peruntukan tahun ini bagi memperbaiki jalan kampung, saluran, taliair, bekalan elektrik, menyusun semula setinggan serta mendirikan gerai perniagaan," katanya selepas menunaikan sembahyang Jumaat di masjid Jamek al-Huda Kampung Melayu Ampang dekat sini, hari ini.

Menurutnya, peruntukan itu akan ditambah tahun depan. Pembangunan raksasa yang membabitkan seluruh kawasan Ampang Jaya akan berterusan hingga tahun 2010. Katanya, kerajaan ingin melihat setiap rakyat di kawasan itu menikmati pembangunan.

"Projek yang sudah dijanjikan ini akan diteruskan meskipun ketika itu Perdana Menteri, Datuk Seri Dr Mahathir Mohamad dan saya sudah tidak menjadi pemimpin lagi. Kami akan meminta pemimpin ketika itu meneruskan projek ini," katanya.

Menurutnya, apa yang dilak-

kukan itu hanyalah untuk memastikan kesempurnaan hidup anak cucu rakyat pada masa akan datang terus terjamin.

Antara lain, projek itu membabitkan pembinaan masjid di Lembah Keramat yang boleh menampung 1,500 jumaah. Pada masa ini di situ tidak ada masjid. Penduduknya hanya menggunakan surau untuk sembahyang Jumaat.

Timbalan Perdana Menteri berharap Kerajaan Negeri Selangor akan memberi kerjasama, terutama mendapatkan tapak bagi mendirikan masjid itu.

Hospital

Katanya, 57 surau akan didirikan di kawasan Ampang Jaya dan lima daripadanya akan dibina tahun ini dengan harga kira-kira \$50,000 setiap satu.

Di samping itu kerajaan juga akan membina sebuah hospital dan enam poliklinik di samping kilang bertingkat bagi mengatasi masalah kekurangan tanah.

"Kerajaan juga akan membina lebih banyak rumah pangsa serta rumah kos rendah bagi mengatasi masalah perumahan terutama di kalangan rakyat berpendapatan rendah," katanya.

Encik Ghafar berharap penduduk Ampang Jaya akan terus bersatu bagi memastikan lebih banyak kejayaan dicapai dan memastikan rancangan berjalan lancar.

Ahli Dewan Undangan Negeri Selangor kawasan Keramat, Encik Mufti Suib dan bekas Menteri Besar Selangor Datuk Haji Ahmad Razali Haji Ali adalah antara lebih 1,000 orang yang turut bersembahyang di masjid itu.